

Swisscom: Ina interpresa stabila cun in bun avegnir

Conferenza da medias a Turitg

DA LUCAS DEPLAZES / ANR

■ **Il gudogn da Swisscom da l'onn 2012 munta ad 1,7 milliardas francs. La svieuta è sa reducida per 83 milliuns francs sin 11,3 milliardas francs.** Cun 9,2 milliardas francs è la situaziun da Swisscom en Svizra stada l'onn passà stabila, ha constatà *Carsten Schloter*, il schef operativ, a chaschun da la conferenza da medias dad ier a Turitg. L'erosiun dals pretschs da var 400 milliuns francs ha l'interpresa pudì cumpensar cun in augment dal traffic sin divers

secturs. Las tariffas en sa sbassadas vinavant. Dapli l'onn 2007 ha Swisscom reducì las taxas sin la rait fixa per 83% e sin la rait mobila (telefonins) per 52%. Il dumber da clients sin la rait mobila è s'augmentà l'onn passà vinavant sin uss 6,2 milliuns abunents.

Ina midada da cultura

Schloter ha constatà ina midada considerabla da cultura durant ils ultims 10 onns e quella tendenza vegnia a cuntinuar. Sa cuntentava il client pli baud cun la transmissiun da text, pled e ma-

letg, pretenda el ussa sin il sector da telecomunicaziun vairs eveniments persunals. Il client modern vul disponer da tuttas sorts datas (text, tun, maletgs, musica, fotos, videos, televisiun), e quai da pertut e da tut temps. Impurtant saja plinavant da pudair avoir access a tut quell'infurmaziun er ordaifer las uras da program. Quest svilup pretendia ina fundada cumpetenzia tecnica che saja capabla da garantir ina rait da transmissiun da gronda capaciad e stabilitad. Ord quest motiv investescha Swisscom – per part esemen cun partenaris –

grondas summas en la nova rait da fibra da vaider. Actualmain è collià cun quella rait in mez milliun chasadas. Davent da 2014 vul colliar Swisscom mintg'onn 300 000 chasadas ed interpresas cun la rait da fibra da vaider per arrivar fin l'onn 2020 sin 80% da la clientella. Sco emprima interpresa porscha Swisscom cun 4G/LTE ina ulteriura rait per la telecomunicaziun mobila da gronda prestaziun. L'onn passà ha investì Swisscom quasi duas milliardas francs.

Pauschals han l'avegnir

Per cuntentar ils basegns e giavischs dal client dad oz e da damaun porscha Swisscom abunaments pauschals «Tut inclusiv» che sa differenzieschan tenor la spertadad dumandada per navigar. Fin uss hajn già 889 000 clients fatg diever da quest sistem numnà «infinity».

La televisiun sin via da success

Cun 791 000 (27%) abunents da televisiun sa chatta Swisscom sin l'emprima posiziun dals divers purschiders. I suondan alura UPC Cablecom cun 730 000 (25%) e la televisiun via satellit cun il medem dumber d'abunents.

Il pretsch da las aczias da Swisscom è s'augmentà 2012 per 13,8%. Ils acziunaris pon quintar cun la medema dividenda sco l'onn passà, numnadain 22 francs pro aczia.

Fastweb

Fastweb, la figlia taliana che Swisscom ha acquistà avant intgins onns, ha fatg quitads ils ultims onns. Ussa saja sa stabilisada la situaziun. Fastweb ha nudà 2012 ina svieuta da 1,6 milliardas euros ed ha pudì augmentar il dumber da clients. Tenor Schloter datti en l'Italia – nua che mo 55% da las chasadas disponan d'internet – anc in grond potenzial.

Dapli efficienza cun ina rait intelligente

En vista a la midada structurala dal provediment cun forza electrica èsi necessari da coordinar optimalmain la producziun da l'energia electrica ed ils divers basegns dals consuments. Ord quest motiv dovri in sistem electronic che po calcular e regular cuntinadamain ils basegns e las pussaivladads da producziun e da furniziun da l'energia electrica.

Swisscom porscha uss cun «Swisscom Energy Solutions» ina rait da datas «intelligenta» parallel cun la rait che transporta il current electric. Il sistem calculescha cuntinadamain ils basegns da la clientella e l'energia avant maun sin la rait. Il sistem stabilisescha la rait e procura per l'effizienz necessaria.

Sco quai che Carsten Schloter ha confermà envers l'anr vul Swisscom extender quest sistem sin l'entira Svizra. Già uss èn passa 200 clients colliadas cun quest sistem e nus quintain cun var milli clients ils proxims mais, ha ditg Schloter. En il decurs da quest onn vegn Swisscom ad entrar en contractivas cun «Swiss grid» (l'interpresa che è responsabla per la rait da transport d'electricitad) per pudair cuntanscher la certificaziun dal sistem. Il singul consument na saja betg pertutgà da la nova installaziun che vegn realisada senza custs (directs) supplementars per ils consuments.



Carsten Schloter, CEO da la Swisscom, ha pudì annunziar in gudogn dad 1,762 milliardas francs per l'onn passà.

KEYSTONE